

## **Anak Tempatan Sabah Yang Layak Akan Diberi Peluang Terajui Jabatan Kerajaan**

TUARAN, 16 Sept (Bernama) -- Usaha sedang dilaksanakan bagi membolehkan lebih ramai anak tempatan negeri Sabah yang layak, diberi peluang mengetuai pelbagai jabatan dan agensi persekutuan.

Perdana Menteri Datuk Seri Najib Tun Razak berkata ketika ini 37 daripada 80 ketua-ketua jabatan dan agensi persekutuan di Sabah terdiri daripada penjawat awam dari kalangan anak tempatan negeri, dan usaha sedang dilakukan bagi menambah bilangan itu.

Menurutnya kerajaan sedang berusaha menempatkan lebih ramai pegawai-pegawai awam persekutuan dari Sabah, ke jabatan-jabatan dan agensi-agensi persekutuan di Kuala Lumpur atau Putrajaya bagi tujuan menimba pengalaman.

"Diharapkan lebih ramai orang Sabah yang menyertai perkhidmatan awam persekutuan dan dengan itu, lebih ramai orang Sabah yang boleh memegang jawatan ketua jabatan dan agensi persekutuan, bukan sahaja di Sabah tetapi juga di tempat-tempat lain," katanya ketika berucap pada majlis perasmian kampus Intan Sabah pada hari Khamis.

Perdana Menteri berkata beliau memang sedia maklum dengan harapan pemimpin-pemimpin Sabah yang ingin melihat lebih ramai anak tempatan menjadi ketua-ketua jabatan dan agensi persekutuan di negeri itu.

Beberapa akhbar tempatan semalam melaporkan kenyataan Naib Presiden Upko Senator Datuk Maijol Mahap yang menuntut supaya lebih ramai rakyat Sabah yang layak dilantik menjadi ketua jabatan dan agensi persekutuan di Sabah.

Sementara itu Najib meminta penjawat awam supaya menyesuaikan diri dengan dengan persekitaran yang berubah, terutama dalam menjayakan program transformasi negara fasa kedua, sekaligus menjayakan wawasan kerajaan untuk menjadi negara maju menjelang tahun 2020.

"Keadaan persekitaran pelaksanaan transformasi fasa kedua jauh berbeza dengan persekitaran fasa pertama. Kaedah yang digunakan sebelum ini mungkin tidak sesuai dan sebab itu, penjawat awam perlu menyesuaikan diri demi menjayakan program tranformasi fasa kedua," katanya.

Najib berkata institusi Intan diharapkan dapat menghasilkan penjawat awam yang terbuka kepada sebarang perubahan, mahu berubah, dan mempunyai minda keusahawanan.

"Justeru, saya harap sebagai "the premier training arm" untuk sektor awam, Intan akan menjadi institut tersohor bukan sahaja di Malaysia malah menjadi rujukan di peringkat antarabangsa," katanya.

-- BERNAMA